

DISPUTATIO MEDICA INAUGURALIS,
DE

HECTICA COMPLICATA,

QUAM

EX DECRETO FACULTATIS GRATIOSÆ,
ADSISTENTE GRATIA DIVINA,

P P Æ S I D E

D. ALEXANDRO
CAMERARIO,

THEORIÆ AC PRAXEOS PROFESS.
ORDINARIO, REL.

DNO COGNATO, PRÆCEPTORE AC PROMOTORE SUO
OMNI HONORIS CULTU PROSEQUENDO,

PRO LICENTIA

GRADUM ATQUE PRIVILEGIA DOCTORIS MEDICI
LEGITIME CAPESSENDI,

PUBLICO ERUDITORUM EXAMINI EXPONIT

AUCTOR

JOANN. THOMAS HOPFER, GERTRING.

AD D. DECEMBR. MDCCXXXIV.

HOR. LOCQ. CONSUETIS.

TUBINGÆ.

TYPIS JOSEPHI SIGMUNDI.

VIRIS,

*Prænobilissimis, Amplissimis, Experientissimis
atque Excellentissimis*

DOMINO

ALEXANDRO

CAMERARIO,

**MEDICINÆ DOCTORI, THEORIÆ AC PRAXEOS
PROFESSORI ORDINARIO CELEBERRIMO, PRÆSIDI
DISPUTATIONIS GRAVISSIMO.**

DOMINO

BURCARDO DAVIDI

MAUCHARTO,

**MEDICINÆ DOCTORI, EJUSDEMQUE, PRO-
FESSORI ORDINARIO, SERENISSIMI DUCIS WURTEM-
BERGIÆ CONSILIARIO ET ARCHIATRO MERITISSIMO,**

**COGNATIS, PRÆCEPTORIBUS
PATRONIS**

**Parentis Locò colendis, & omni cultu ætatem
venerandis**

Devotionis & gratitudinis ergò

Disputationem hanc Inauguralem

Offert ac dedicat

JOH. THO. HOPFFER.



Σ. Θ.



Um ad finem sub DEI Gratia perducto studiorum academicorum studio, superatis quoque feliciter examinibus, de specimine profectuum publico cogitandum, atque Disputatio Inauguralis conscribenda mihi fuerat, non equidem hæsitare diu, vel sub meditatione profunda ungues dentibus arrodere necessum habui, undenam thema petere sive velim, sive debeam. Ecquid enim aliena sequar, cum domi suppetat, quod agam, in quo genium exerceam meum, revocando in memoriam, & conservando in historia medica, quod passus est, qui morbi sui historiam litteris Ipse consignavit, & ad Disputationem inde conscribendam benevole concessit, *Dominae* MATERTERÆ meæ MARITUS, Cognatus & Patronus, nec non studiorum quoque meorum Adjutor, omni honoris cultu venerandus. Occasionem igitur hancce prorsus favorabilem ambabus, quod ajunt, manibus arripio, multo mihi facilius fore judicans, in cathedra disputatoria defendere argumentum minime peregrinum, sed dome-

domesticum , cui toties adstiti compatiens , querelarum non minus ac remediorum factus particeps. Infirmi-
tatis autem ac tenuitatis meæ conscius, Alios doce-
re non præsumo, sed argumentum modo conflictui pa-
rare sustineo , proin historiam morbi, conceptis ab æ-
groto verbis, ne minimum quidem mutaram fisto , no-
tulas saltem aliquot subsecivas potioribus ejusdem mo-
mentis ac periodis adpersurus. *Faxit Deus feliciter !*

“ **A**nni superioris mense Majo (I.) febre tertiana per dies
quatuordecim laboravi, & quidem (II.) legitima,
quæ post assumptam potiunculam (III.) laxantem e fo-
liis sennæ , rhabarbaro atque manna calabrina , sine
usu antifebrilium , scilicet corticum , sponte cessavit.

Post (IV.) febrim hanc superatam symptomata seqq. sese ma-
nifestarunt : Scil. tussis (V.) ferina, noctu vehementius affli-
gens, dolor lateris sinistri punctorius , obtusus vero lumbi si-
nistri. Hic dolor similis erat illi, quem vulgus vocat das milz
hacke einem ; huncque dolorem pro lubitu , manu contingens
illum vel mollius vel durius, augere vel minuire potui, hac cum
circumstantia notabili , quod post cibum & potum assumptum do-
lor sese quasi occultaverit , sic ut locum abdominis affectum abs-
que ullo dolore digitis non saltem tangere, verum etiam compri-
mere potuerim. Post (VI.) pastum vero maximæ mihi mole-
stie fuerunt angustie præcordiorum , respiratio difficilis , dolor
stomachi gravativus , atque tussis ; Quæ, circa vesperam semper
exacerbata , cum dolore punctorio utriusque lateris , dextri ta-
men præ sinistro , per totam inde duravit noctem.

Hæ querelæ a mense Junio (VII.) protractæ usque in no-
vembrem fuerunt , appetitu semper bono existente , tempus diur-
num semper tolerabilius nocturno fuit ; quapropter omnes officii
partes , non quidem sine molestia , præstare tamen adhuc potui.

Sternu-

Sternutatio & oscitatio forte venientes dolorem tam in pectore, quam in abdomine, exquisitissimum mihi commoverunt.

Ingravescentibus sensim. (VIII.) sensimque symptomatibus, inprimis tussi ac tabe totius corporis, inopinato die septimo Novembris asthma spasmodicum convulsivum noctu me invasit, cum dolore lateris dextri, inter costam quartam & quintam, exquisite punctorio; Respiratio antea libera subito ita præclusa fuit, ut medicamentorum nihil, nisi liquoris cornu cervi succinati atque spiritus salis armoniaci anisati, dosin anaticam, assumere potuerim. Externe tamen lateri valde vehementerque dolenti epithema domesticum calide fuit impositum. Hic paroxysmus per sesquihoræ spatium me miserum misere torisit. Die hujus mensis undecimo recidiva quidem asthmatis recurrit, sed non tanta cum vehementia tam doloris punctorii, quam respirationis difficilis.

Superatis per DEI gratiam hisce duobus paroxysmis spasmodicis, omnes ceteræ querelæ tolerabiles fuerunt, excepta tussi, quæ exacerbata in dies fuit, donec (IX.) die quinto Decembris tormina ventris acutissima è somno mane me excitaverunt, quæ brevi secuta est diarrhœa cruento purulenta, cum tenesmo vix tolerabili, qui tenesmus omnes postea excretiones alvinas, similiter cruentas atque purulentas, per solis, lunæ martisque dies insequentes, graviter exacerbavit. Sanguis excretus grumosus fuit, & fundum vasis statim petiit, aliquoties tamen etiam fluidior & rubicundior dejectus.

Huic symptomati urgenti potus calidi, Thee, Coffee Chocolata, lacte remixti, remedio fucere; Clysteres domestici per diem bis applicati; quorum usu continuo malum hoc cruento purulentum in totum cessavit.

Circa hanc diarrhœam, dysenteria rubræ similem, notatu dignum erat, quod tam laterum punctorius, quam abdominis obtusus dolor, si vel maxime non in totum, in tantum tamen

imminutus fuerit, ut lateri utrique rursus incumbere potuerim.

Tussis (X.) antea semper vehemens, & cum dolore pectorio conjuncta, per hoc accidens mitis ac benigna facta est, corpusque, viribus exhaustum & exsuccum, somnum recuperavit; Diebus sequentibus etiam expectoratio liberior, cum sputo viridi tenaci facile prodeunte; Mane vero ter quaterve tussiens, dolorem perpeffus sum toties pectorium, qs. acuum puncturis similem, in dextro pectoris latere, infra costam quartam & quintam sese diffundentem, quem semper secutum est sputum flavo viride tenax.

Interea venerunt (IX.) duæ novæ circumstantiæ; Scil. intumescencia, vel inflatio potius, pedum attactu frigida, imprimis circa suras, earumque dextram fere præ sinistra, quæ tamen in lecto statim evanuit. Altera, sudor nocturnus, per usum chocolate imminutus.

Rebus sic stantibus, per octiduum videbantur symptomata multum imminuta, die autem (XII.) decimo nono Decembris secuta mutatio notabilis, tussi vehementer aucta, præcordiorum angustiiis, laterum dolore pectorio exquisito, tam in antico pectore, quam in dorso, donec tandem nocte insequente, circa horam secundam atque tertiam matutinam, quatuor vel quinque vicibus sputum veniret cruentum, pure remixtum, cætera flavo virescens, glutinis instar tenax. Constans fuit hoc diebus etiam sequentibus Phænomenon, nihil unquam cruenti vel purulenti per totum diem reliquum fuisse sputo rejectum, sed quasi per paroxysmos, horis modo matutinis secunda & tertia, prævio sudore prius dicto, comparuisse saltim sputum cruentum atque purulentum. Sicuti etiam cruoris usque minus in sputo fuit; Ita vigesimus octavus decembris finem expectorationi cruenta tulit.

Ructus (XIII.) summe dolorifici augebant dolorem lateris dextri,

dextri, a costa quarta ad septimam & octavam usque descendentem; Abdominis vero dolor recrudescebat, hac inprimis molestia stipatus, quod sine dolore acutissimo corpus erigere non valuerim; Quapropter hoc incurvato, & ad latus sinistrum reclinato, incedendum mihi tandiu fuerat, donec abdominis & thoracis muscoli aridi, exsucca & quasi breviores facti, successive iterum extendebantur.

Hucusque (XIV.) caput immune mansit, & a querelis liberum. Jam vero per aliquot dies vertiginoso modo ohnubilari cepit, & perrexit, donec trigesimo Decembris e lecto mane surgentem grave animi deliquium prehenderit, per dimidium horæ spatium durans; Assistente tamen Gratia Divina præter spem feliciter superatum, idemque simul phenomenorum abs me notatorum ultimum.

Pulsus semper equalis erat (XV.) versus noctem parum celerior ac citatior. Urina colore citrino, quandoque magis rubicundo, cum sedimento plus minus bolari.

Quod ad Curam: (XVI.) Pectori pectoralia lenia; Abscessibus intestinorum, & Ulceribus pulmonum, data fuerunt abstergentia, mundificantia, consolidantia, vulneraria & traumatica; Externe, partibus in pectore & abdomine dolentibus, unguenta pectorale & resumptivum.

Uti Diæta optima Medicina; (XVII.) Sic idem hoc in casu quoque revera fuit. Quantum enim valuerint emulsiva, gelatinosa, nutritia, potus calidi coffe & chocolata cum lacte, hujus testis per DEI gratiam superstes est Ægrotus Ipse.

Quod statum (XVIII.) jam concernit præsentem, supersunt adhuc querelæ quædam, scil. tussis, respiratio difficilis, post prandium difficilior, difficillima tamen ab ascensu acclivi atque cæna, quapropter cænare mihi non licet. Intumescunt etiam rursus ad suras pedes. Et exacerbantur hac rigore hyemali. De cetero res bene se habent.,,

(I.) Qui hic febre tertiana laborasse dicitur, Idem ille est, qui quondam sub Dn. Præsidis mei B. PATRE Disput. sua pro Licentia ventilaverat quæstionem : *Accola nistri cur adeo febribus obnoxii ?* Primum igitur, adtentionem nostram mereri quod videbatur, est *Subjectum*. Medicus, febre laborans tertiana. In ACT. PHYS. MED. NAT. CUR. VOL. I. *Appendice* magna cum voluptate nuper legi *Memoriam Camerarianam*, sive Orationem, quam B. Patri suo Dn. Præses meus Filius Successor habuit, Parentatoriam, ex qua, præter alia multa bona, cognovi, beatum illum Virum, aliquando graviter ægrotum, post valetudinem recuperatam pro rostris academicis dicturum, orationis suæ thema constituisse *Medicum Ægrotum*. Si tum licuisset mihi esse adeo felici, & audire Istum ita perorantem, auderem certe præcipua sermonis momenta huc transferre. Audio enim, Ipsum tanta cum dictionis suavitatem, non minus ac argumentorum dignitate, solitum verba facere ad pubem academicam, ut ad audiendum istum magna semper frequentia avide confluerint. Succurrit tamen etiam antiquum illud, a modo laudatæ *Academiae Imperialis Naturæ Curiosorum* Illustri & Magnifico Domino PRÆSIDE in *Adagia Medica* relatum : *Medicus, Ipse ulceribus scates*. Quemadmodum igitur in disputationibus academicis Præses & ipsius Respondens stant pro persona una ; Sic in praxi clinica sæpe medicus & ægrotus etiam conveniunt in persona una, cute reguntur eadem. Præter enim fragilitatem corporis propriam, qua homines utique sumus, etiam, ut alii, mortales, adeoque morbis non minus obnoxii ; Insuper dudum omnibus innotuit triste illud sostrum, pendi medicis quod ab ægrotis assolet. Utinam modo febres essent intermittentes ! Non continuæ malignæ, ut proh ! dolor in vicina Argentoratensium Academia fieri relationibus publicis undique docemur, atque vices Ejus maximopere dolemus, non sine piis ad DEUM precibus, ut Gratia Sua Sotheria clementer Eidem opituletur, simul vero Eberhardinam Nostram ab omni lue immunem præstet !

(II.) Alterum *Morbus* est, quo laboravit Noster : *Tertiana* febris, & quidem, ut testimonium ipsi perhibet Medicus ipse ægrotus, *legitima*. Hanc indolem utique demonstravit duratione sua non longa, sed HIPPOCR. *Apher. 59. S. IV.* conformi ; Septenis enim

enim ad summum circuitibus juxta hunc terminari tertiana exquisita debet. Cadens etiam in Virum juvenem, cholericus magis quam fere cujuscunque alterius temperamenti; servans invadendi tempus vernal ac antemeridianum, neque paroxysmos ultra duodecim horas extendens suos. Quam & hac occasione optandum esset, ut obtingerent omnibus febres istiusmodi saltim legitimæ; Ita non haberemus amplius, quales in ægroti nostri *Disput. cit.* deprehendo, febricitantes vel *novitios* vel *veteranos*; Nec audirentur querelæ Medicorum de febre *tertiana anomala maligna*, quæ thema quondam præbuit Dn. *Præsidis* B. AVO, vel de febribus *corruptis*, quas Disputatione peculiari perstrinxit STAHLIUS. Et si vel maxime non cessarent sponte sua, medicamentis tamen auscultarent congruis, neque medicis, nec ægrotis molestæ, vel durationis longitudine, vel recidivarum frequentia.

(III.) Tertium est adhibita morbo *Cura. Naturam esse morborum medicatricem*, vix ullibi frequentius adparet, ac in febribus quidem intermittentibus. Non opus erit, multa hujus rei testimonia conquirere, quæ magno numero prostant passim. Sufficiat unicum audire SENECA. Ex ejus ad *Lucilium* suum *epist. 104.* novimus, Ipsum peregrinatione febrem curasse surrepentem, & *Paullina* licet sua atque Medico renitentibus, cum urbis gravitatem vix excefferat, adeo mutatam protinus sensisse valetudinem, ut subjungat: Quantum deinde adjectum putas viribus, postquam vineas attingi? In pascuum emissus, cibum meum invasi. Repetivi ergo jam me. Non permansit marcor ille corporis dubii, & male cogitantis. Incipio toto animo studere.

Quemadmodum ergo febris hæc deseruisset forte Nostrum sponte sua; Tam opportune tamen ab Ipso per *potiunculam laxantem* fuit tractata. Sublata enim causa effectum quoque sublatum iri spes erat fundatissima, quam eventus quoque confirmavit. Formula temperamento prius dicto convenientissima, simul etiam extra febres ad purgandum aptissima, quippe non modo facile fortioribus acuenda, verum etiam ad cujuscunque palatum adcommodanda, ceterum præ multis aliis secura.

Antifebrilia, sine quorum usu curata febris dicitur, modo transeant. *Cortex* autem, quem sub istis intellexisse Nostrum declarat adjunctum *scilicet*, sine censura omni non æque potest transmitti. Notum est, quam laudetur ab his, verum etiam adhuc hodie culpetur ab illis cortex, ut acidum quondam, insons. Neque minus notum est, quid ante paucos annos pro ipso scripserit Dn. PRÆSES meus in Disp. de *usu corticis a febribus ad icterum extenso*. Eadem Ipsi hodiernum stat sententia. Quia tamen calamitosum hoc anno bellum, & hujus gratia numerosum valde ad Rhenum habuimus exercitum, animo succurrit cautela, quam in lectionibus hybernis quondam ab Ipso audire me memini: Ne quis cortici adscribat noxas *arsenico* debitas, cortici clanculum a maleferiatis olim admixto. Scommma illud in corticis Patronum, de Arte nostra bene meritum, minime curo. Sit MORTONO nomen a *morte*, sed *in exilium acta*, nec amplius tantam hominum stragem edere valente.

(IV.) Notanter in historia dicuntur phænomena vel symptomata ista venisse non a febre, sed *post* febrem, & hanc quidem si vel maxime non sponte terminatam, methodice tamen curatam, ac feliciter superatam. Hanc objectionem enim occupare *Noster* voluit verbis jam superioribus, ne quis arbitrari possit, a febre male curata, vel importune ac præmature per corticem suppressa, venisse demum ista, quæ ne quidem deprehendo talia, ut pro febrium reliquiis haberi vel venditari possint. Quod enim de hypochondrio sinistro dicitur, & cum plebis illo, *das milz hacke einem*, comparatur, id alterius plane generis fuisse, nec a placenta febrili, quam vulgo vocant, originem sumsisse, ex seqq. ad oculum patebit. *Deinde*, si quod res est licet eloqui, animadversa in Nostro fuerunt talia morborum dicendorum fundamenta jam prius, quam febre quidem laboraverat intermittente. Tussiculosus enim fuerat jam ab annis plusculis, & de laterum suorum modo hoc, modo illo querulus, sed minorum gentium Deos ista reputans eorum incurius, corporis autem contabescentia sensim obrepente Suis tanto magis suspectus.

(V.) Symptomata dicuntur paucis consistere in duobus: *Tussis* ac *puncturis*. Qui febriliter dejectus tussire dicitur, ac in laterum alterutro pungi, illum alias vulgus habet pro pleuritico, maxime si sputum accedat cruentum, quod etiam hic adfuisse, sed demum longo tempore post venisse, infra audiemus. Neque tamen hic pleuritis fuit; quippe febris acuta continua inflammatoria defuit, generis longe alius febre vel jam latente, vel sensim subrepente, ac sub cineribus gliscente. *Tussis*, sicca fuit, inanis, ac vespertino tempore exacerbata, quod ipsius causam quasi continentem, atque febris modo citatae naturam, naris emunctioris medico facile significat. *Ferina* prædicatum non reportavit eo sensu, quo infantes epidemia quandoque vexat tussis spasmodica, vere convulsiva; Sed vehementiam modo atque pertinaciam ejus Autor isto innuere voluit.

Dolor duplex, loco etiam non uno, fuit, nec unus ab altero pependit, sed suas sibi res quilibet seorsim habuit, adeoque morbum complicatum declaravit. *Unus* magis pungens & *acutior*, in dextro *pectore*, ad costam thoracis quartam & quintam infra determinatus, magis etiam novitius, & recentius demum venisse observatus, procul dubio eandem cum tussi causam habuit, suo loco dicendam. *Alter obtusior*, magis in profundo, infra hypochondrium sinistrum, in *lumbo* illius lateris, & abhinc versus ilium, ad usque hypogastrium fere, se extendens, sed ante priorem observatus, gemino illo seorsim notato phaenomeno statim explicando singularis. Hunc causam tamen priori similem habuisse, effectum quoque non dissimilem produxisse, ex dicendis adparebit.

Quod enim jam concernit *das so genandte Milz hacken*, cum quo comparare Noster dolorem suum voluit, ille non est alius, quam *pulsatorius*, hisce ipsis diebus a Dn. PRÆSIDE in Disp. d. *Tum. præcord. int.* secundum differentias suas potiores descriptus, pro diversitate causarum & objectorum modo magis infarctuosus obstructorius, alias forsan magis restrictorius, congestorius, saltim

temporarius. Quid autem? si dicamus, fuisse Nostri dolorem, quo propius ab autumno hyemi adpropinquavit, eo magis inflammatorie pulsuosum, qualis, ut vomicarum & abscessuum internorum comes, ex CÆLIO AURELIANO Disp. cit. fuit allegatus.

Doloris istius *phenomenon alterum* concernit *ad tactum* externum, quem adeo ægre tulerit, inde toties exacerbatus, saltim non a pastu, quo tempore impune licuerit contingere locum affectum, etiam duriuscule. Neutrum admiratione tanta dignum mihi quidem videtur. Quam enim naturale est, e. g. digiti paronychia saltim obsessi fibram tensam crispataque, ut adpulsum sanguinis arteriosi, ita multo magis digitum tangentis, aut corporis universi succussionem subitanæ à sternutatione, vel pulmonum expansionem, & partium abdominis compressionem; sub oscitatione, infra citatis, ægre ferre, ac abhinc acerbius dolere; Tam naturæ rei non minus ac experientiæ conforme est, a calidorum, quasi totidem fomentorum, admotione fibras ita tensas crispatasque demulceri ac relaxari, præsertim si, per modum diversionis aut revulsionis, a loco adfecto ad ventriculum, pro cibis ibi concoquendis, natura revocetur.

(VI.) Distingue tempora, tum etiam hic concordabit scriptura. Quædam horum venerunt citius, alia tardius, culpa vel ventriculi, vel sanguinis, a novo chylo subintrante turgescens. Scilicet *ventriculus* cibo repletus ampliatur, diaphragmati sub inspiratione descensuro minus cedit, quin hoc quandoque sursum trudit, ac thoracis cavum arctat, proin pulmonibus pristinum semet expandendi spatium non concedens, sanguinis per illos transitum difficilem, majores ergo cordi labores facessit, atque adeo *respirandi difficultatem* excitat.

Cardialgia aliunde derivanda, atque rerum non naturalium vitio cuicunque potius, quam morbo ceteroquin primario, adscribenda erit, unde etiam non semper adfuit, sed per intervalla satis utique vaga ægrum invasit. Erat enim nec diætæ observa-
tor,

tor, nec animi pathematum moderator, adeo strenuus & rigorosus, unde, pro laxioribus in horum alterutro habenis, etiam illa variare fuit animadversa.

Angustia autem *præcordiales* venisse serius deprehensæ sunt ab incallescencia post pastum hæcticis familiari, quibus tum rubore genas suffundi, manuum volas incallescere, pulsus citatiorem fieri, atque adeo febrem quasi temporariam excitari, in vulgus notum, hæcticisque cum hypochondriacorum multis commune est.

(VII.) Hoc febribus hæcticis proprium est, durare tam diu, non in menses modo, sed annos, atque adeo etiam actu ipso tueri nomen *lenta febris*, præsertim si jam radicata vel habituata fuerit, & juxta loquendi formulam Hippocratis non aliquis ipsam, sed hæc illum habeat. Nec est, quod quis credat, semestri quidem hoc morbum circumscribi. Quemadmodum enim supra notatum est, prima ejus flamina fuisse posita jam citius, ante febrem vernalem; Ita nec febris finem incidisse vel in Novembrem, vel Decembrem, ex sequentibus patebit. Abbreviari tamen etiam, vel prolongari potest febris istiusmodi, tam a medico, quam ab ægroto, prout eorum unus vel alter, vel uterque, sese gesserit.

Deinde, quemadmodum de hydropicis alias observant, quod, quo plus sint potæ, plus sitiantur aquæ; Ita vicissim de hæcticis, præsertim vero phthisicis genuinis, notum est, illos non *adpetitum* modo servare suum, sed interdum insolenter *edaces*, quin *voraces* fieri, scilicet quo magis vel sudoribus colliquescent, vel alvo diffluunt, aut ulcerosa pulmonum labe toto corporis habitu contabescunt.

Denique, quod *exacerbationum* horas concernit, sunt hæ *vespertina* ac nocturnæ. In suppurationibus enim internis omnibus ad noctem labores observari dixit HIPPOCRATES *Libr. V. Epidem.*

§. 73. Ingruente igitur diei vespere solet, pro ratione febris diversa, vel clarior vel obscurior, in ægrotis talibus notari vel horripilatio, vel minor saltim caloris consueti gradus, & frequentior audiri tussis, reliquum abhinc transigi sub incallescencia ac pulsus, imo reliquorum forte conjunctorum symptomatum, ratione febrili consueta. Proinde me non monente quilibet facile perspicit, quanta hæc sit molestia medico praxi clinica occupato, si, per horas diurnas ægrotorum suorum valetudini se totum consecrans, die vesperscente cum proprio miseri corpusculi morbo conflictari necessum habet. Nemo hac parte miserior est *medico*, vere *adflcto*, & frustra necessariam corpori ac animo fessis requiem anhelante, cui ne pro indigentia quidem sua relinquitur, quod pro satiando voluptatum desiderio adhibuisse C. J. CÆSAREM novimus ex illo *poetæ* blandientis disticho: *Nocte pluit rota, redeunt spectacula mane, Divisum imperium cum JOVE CÆSAR habet.*

(VIII.) *Asthma* dudum innotuit, tam medicis quam ægrotis, ut mirabile phantasma, quod nullum curat cataplasma. Non hic locus est agendi de illo ex professo. Legi, si cui lubet, poterit *Disputatio*, quam Dn. *Præsidis* B. Avus sub hoc titulo reliquit. Ego mearum modo rerum satagens, continebo me intra terminos mei casus, potiora ejus momenta perpensurus.

Asthma hæctica, inprimis alteri ex infra dicendis, facile jungi patet vel ex ægris, quos sollicitè recenset STAHLIUS Diff. d. *Hæctica abscessuum internorum comite*. Fuit autem hoc Nostri, ut tussis hæctenus, *siccum*, non humidum, nec a pituita viscida excitatum, unde nec ejusdem exscreatione terminatum, quippe quod ab indole ac temperie Nostri prorsus alienum est; Gradu vero tam intensum, ut *spasmodici* & *convulsivi* prædicatum utique meruerit. Potest enim etiam hæc respirationis actio, non augeri tantum ac imminui, verum etiam depravari, prouti caducus pulmonum probat, atque tussis convulsiva prius dicta.

Causam Noster innuit, doloris in pectore punctorii augmentum citans. Scilicet non arbitror, subfuisse hic respectum, vel hæmorrhagicum in genere, vel hæmoptoicum in specie; Sed incrementum sensim usque magis pulmonum inquilino infra dicendo, hujus apertionem, illorum vero liberationem, intendisse Naturam, ab occasionali causa forsan irritatam. Etenim fuerat septimus ille Novembris inter *Novilunium eclipticum*, conjunctione *jovis & mercurii* stipatum, ac *saturni* cum *venere* trigonum, cum *mercurio* quincuncem, quasi medius, post primam mensis septimanam frigidam hybernā, primus iterum nubilus, pluviarum ventique ad aspectus posteriores tempestuosi prodromus, cum servo chymicorum fugitivo etiam in tubo Torricellii æque perambulano, ac, ex altitudine ad profundum celeriter delapso, citatis gressibus nunc resurgente.

Gravitatem passionis declarat *respirationis præclusio* tanta, ut præter paucas liquidi guttas transmittere nihil isthmus iste faucium potuerit. Hanc miseriam dicas cum aceto mixtam, si quis, sæpe frigidissima etiam hyeme ad fenestras aperiendas properare coactus, erecta cervice utrinque humeris lateribusque laborare, ex infimo abdominis anhelare, & extremis narium pinnis quasi captare auram, omnibus aliis liberam, anxie tenetur. Laudatus SENECA paroxysmum in semetipso similem expertus illum *Epist. LIV. Lucilio* suo sic describit: "Longum mihi commeatum dederat mala valetudo: repente me invasit. Quo genere, inquis? Prorsus merito interrogas: adeo nullum mihi ignotum est. Unum tamen morbo quasi assignatus sum; quem quare Græco nomine appellem, nescio. Satis enim apte dici suspirium potest. Brevis autem valde, & procellæ similis, impetus est: Intra horam fere desinit. Quis enim diu expirat? Omnia corporis aut incommoda, aut pericula, per me transierunt; nullum mihi videtur molestius. Quidni? aliud enim quicquid est, ægrotare est: hoc est animam agere. Itaque medici hanc meditationem mortis vocant. „

Therapia sua Noster acu rem tetigit. Enimvero etiam hic causa

causa sublata, spasmo per liquorem cornu cervi succinatum sedato, effectus tolli potuit eo certius, quo minus de natura spasmi fuerat scena morbi primarii reliqua universa. Externa tamen pargorica symbolam quoque suam contribuuisse opellam firmiter persuasus credo, præter omnia alia Disput. prius cit. nixus.

(IX.) Nunc scena tandem plenius instrui, morbusque indolem suam prodere incipit. Vocatur quidem *Φαινομενον* hoc *υπερ-γυνομενον* a Nostro *Diarrhoea Dysenteriae rubrae similis*; universus tamen ejus adparatus sic describitur, ut affectus genuinus ac primarius latere possit neminem. Scilicet Dn. *Præses* a Nostro super querelas suas consultus, Ipsum in gremio suo hostem gestare occultum, *abscessum* in abdominis quadam parte latentem, Eidem jam dixerat, cum adhuc altum de pectore fuerat silentium. Hoc criterium diagnosticum eventus hodie confirmavit, & abscessus iste, quemadmodum doloris illius alterius supra dicti, licet obtusioris, contactum tamen ægre adeo ferentis, causa fuit notoria; Sic *ruptione* sua dictum *alvi fluxum* ex *cruento purulentum* excitavit. Unde prima nunc, ad minimum ruptionis & manifestationis ordine, prodit *Hæctica Abdominalis*, non hodie demum abs rupto, sed jam sub & ab hætenus occulte gestato abscessu nata, conformiter illis quæ ex *SECRETÆ L. d. Febr. Castr. Mal.* Nepos cognominis *Disp.* sua *Inaugur.* deduxit quondam sub Dn. *Præsidis* B. PATRE.

Quam præcise partem occupaverit abscessus, arduum est determinatu. Doloris *locus*, a lumbo per ilæi regionem, ad usque hypogastrium protensus, intestinum, aut ileum aut jejunum, vel his proxime confinem mesenterii partem innuere; *Species* autem, atque a pastu mitescendi consuetudo, suspicionem confirmare videntur.

Excretio sanguinea hic fere largior describitur, quam ut ab ab abscessu rupto illam tantum venisse crediderim. Num hæmorrhoidalis dici, & *tenesmus* huic principio simul adscribi possit, conflictui reservabo. Dolorum vero mitigatio, ac decubitus iterum

iterum promiscuus, a rupto procul dubio venit abscessu, conformiter HIPPOCR. *Aphor. 47. Sect. II.*

Tandem *Therapia* paucis etiam tangenda. Hanc mirabuntur non pauci; Nec minus erunt forte totidem, qui desiderabunt illam non ægroti. Sed in vado res est. Jam suo quondam tempore GALENUS, hæcticam *aquæ* saltim *frigida* potu securasse, gloriatus est *L. X. Meth. Med. Cap. V. & VI. ac L. d. Marcore C. VII.* Quanto magis igitur aqua calida, herbarum traumaticarum virtutibus imbuta, ac ad affectum locum immediate delata, necessariis vero abstergentibus atque mundificantibus, non minus ac balsamicis, in clysteribus adjuncta, tandem lacte ac oleosis nutritiis hæcticæ adcommodis permixta, idem adhuc hodie præstare poterit. Testimoniis non indigebo multis. Sufficiet allegare *Nat. Cur. Vratislav. Histor. Morb. A. 1699. p. 112.* juxta cum Illustr. FRID. HOFFMANNI *Dispp. de Seri Lactis virtute longe saluberrima, & mirabili Lactis Asinini in medendo usu.*

Denique, *cessasse* quidem in *totum* dicitur alvus ex cruento purulenta; Sed num cessatura quoque sit in perpetuum, id quidem cum Deo & die experiemur. Abscessum talem ac tantum, intra tam paucos dies, potuisse penitus mundificari, & consolidari constanter, id quidem optandum potius, quam sperandum est. Si concipiamus ut vomicam, cum folliculo suo proprio, hunc evacuatum, & in lateribus suis collabascentem, rursus impleri, citius vel tardius denuo rumpi, id quidem tantum non quotidianum est. Ex Medici Massiliensis NICOL. CHESNEAU *Observ. L. V.* constat, fceminam, ab abscessu hypochondrii dextri ita feliciter rupto, ut pus vomitu rejectum, tribus Medicis visam fuisse perfecte sanatam; Post annum vero, cum ille denuo repletus esset, macie confectam, extricare se non potuisse, sed succumbentem demonstrasse, quam sint spes hominum fallaces.

(X.) Obiter modo perlegenti hunc §. videri posset, *abscessum* similem nunc etiam in pectore *ruptum*. Mihi tamen *necdum* ita videtur.

detur. Sed tussis hæctenus importuna mitescere, ac pure intus cocto abscessus, quamvis adhuc clausus, tamen mollescere, inflammatio remittere, proinde dolor mitigari, atque decubitus tolerabilior fieri, simul vero sputum ex pulmonibus mucosum tenax prodire, & ex sicca in humidam mutari tussis potuit, absque tamen eo, ut abscessum statuere debeamus ruptum, quippe cujus phænomena pathognomonica sequuntur demum infra.

(XI.) Nimium ne fide colori; fallit enim. Sic in morborum diagnosi atque prognosi symptomatum uni modo vel alteri. Gaudibat in sinu, atque res in vado suas esse, reputabat Noster, quod asthma non recurreret, alvus purulenta cessaret, tussis mitesceret, Ipse decubitus promiscue rursus ferret. O! igitur iterum spes hominum fallaces. Adhuc latet anguis in herba. *Febris* superest, qua corporis habitus depascitur, humores liquantur & vappescunt, adeoque tam sudor nocturnus, quam intumescencia pedum excitatur. Hæc febris, uti fere flammula lampadis, non uno semper modo sese habet, quandoque admodum remissa, quin vix notabilis, alias iterum exardescens; quod ipsum, ut ab innumeris circa res non non nat. erroribus, sic imprimis a supuratione vomicarum, earundemque vel inflammatione superveniente, vel ruptione ac subsidentia, fieri & cum his pari passu ambulare observatur. De sudore autem hæcticarum qui plura volet, evolvat tam NATURÆ CURIOSOS URATISLAVIENSES, quam STAHLIUM loc. atque Disp. supra citatis.

(XII.) Jam scena demum panditur secunda, dum clausa hæctenus gestata rumpitur *Pulmonis* dextri *Vomica*, proin *Hæctica Abdominali* supra dictæ nunc sociam se declarat *Hæctica Abdominalis*, vulgo dicta *Phthisis*. Equidem ab hæctica non nisi subiecto differt phthisis; pulmonibus ulcerosis propria, dum ab aliarum quarumcunque, quandoque etiam externarum modo, partium ulcere, tam aperto quam clauso, dicitur hæctica e.g. hepatica, renalis, vel alia. Non igitur illo sensu hæcticam dicimus complicatam, quo talem exhibuit olim B.D. BRODBEQUIUS *Disp. Inaug.* habita in duas Galeni historias L. 10. Meth.

Meth. cap. V. in Med. & L. I. Febr. cap. x. Hecticæ simplici alteram, cum putredine talem, superaddens, eandemque non solum frequentem, verum etiam cognitu difficilem, curatuque arduam adserens. Quod egregie postea declaravit Ejus Successor, Dn. *Præsidis* mei B. Avus, in *Posit. Medic. Inaug. Th. III.* contendens, dari febrem lentam tabificam non ulcerosam, sed quasi essentialem & primariam, ab hectica distinguendam. Sed hecticam putridam cum putrida complicatam, ab ulcere genuino diversis partibus inhærente natam, priscorum loquendi more, modernorum vero phthisin genuinam hecticæ veræ junctam, nos hocce casu sistimus, hecticæ tamen in disputationis rubro servantes nomen solum, tanquam magis generale, melius etiam quadrare visum, prorsus conformiter illis, quæ in *Disp. cit. d. Hect. abscess. intern. com.* STAHLIUS. Non jam nec animus est, nec instituti etiam ratio permittit, quæ de affectu utroque dici ac forte notari maxime mererentur, congerere, inprimis secundum differentiam illam generalem, quam morbus offert in primo, secundo vel tertio sui gradu constitutus, vel primigenius vel symptomaticus, ab ulcere vel clauso vel aperto, vel definito vel indefinito ortus. Ablegabo de talibus sollicitum ad *Phthisiologiam* MORTONI, notulas vero adspargere ego pergam præcipuis etiam hujus periodi momentis.

Tempus vomicæ pectoralis ruptæ, non minus ac illud asthmatis, videtur aliquod notatu dignum exhibere phænomenon. Quam illud, atque ruptura vomicæ abdominalis, inciderunt in Novilunium, tam undevigesimus ille Decembris proximus fuit ante Plenilunium, mercurio retrogrado ac solstitio hyberno notabile, quod post lutum, pluvias atque nives (sub quibus, non dicam ominosa, oppido singularia tamen atque extraordinaria fuerunt Dresdæ quidem fulmina alibi saltim fulgura ac tonitrua) plenam nobis tulit hyemem ac rigorem boreæ, cum cœlo sereno, ac statione mercurii, per totum quidem mensem altioris, hisce diebus tamen omnium suprema. Quotus quisque vero est, qui ignorat, frigus pectori esse inimicum, jam suo quondam tempore id observante ac no-

tante HIPPOCRATE in *Sect. III. Aph. 5. & 17. ac Sect. V. Aph. 24.*

Deinde, *augmentum tussis*, crescens rursus præcordiorum angustia, atque exacerbatio puncturarum, ab anterioribus etiam ad scapulam in dorso semet extendentium, prodromus fuerunt mutationis in pectore imminentis, ut fere criseos futuræ nox præcedens inquieta.

Sputum cruore tinctum, vel potius variegatum, confirmat quod nos supra diximus: Scilicet tam cruorem alvinum, adeo multum, ex abscessu ibi rupto non posse derivari solum; Quam expectorationem, jam a fine Novembris observatam, nec tamen a rupta tum pulmonis vomica fuisse, neque purulentam. Quod enim circa sputum sæpe res adhuc sit valde dubia, prudenter quondam monuit Dn. *Præsidis B. PATER Diss. cit.* & facile concipit, qui perpendit differentiam inter pus, ichorem atque saniem, cum illorum primum ejus gravitas specifica in aqua quidem subsidere, neque tamen conversam hujus propositionis ut regulam universalem valere, faciat.

Porro, mirari subit, cur *cruor* sputo purulento mixtus continuaverit in *diem* usque *nonum*. Rationem in exacerbationibus periodicis quærendam esse, num recte statuam, conflictus docebit. Tales autem *paroxysmorum* periodos jam GALENUS olim Hecticæ putridæ signum dixit, in historiarum cit. altera, & laud. BRODBEQUIUS ex hac ipsa ratione febribus magis intermittentibus adnumeravit, dum hectica simplex uno potius continuo tenore pergat, non nisi forsan illa, supra jam a nobis allegata, una, duabus vel tribus a pastu horis veniente, incalescentia varians.

Denique, *sputum* cruento *purulentum*, circa secundam vel tertiam matutinam, & *sudore* quidem *prævio*, demum processisse observatum, tria suppeditat notatu digna: *Primo*, tempus sudoris hectici, discretivum ab sudore quocunque alio, aliis horis, præsertim matutinis, tardius veniente. *Secundo*, natura tenax est ordinis sui, & observantissi-

ma temporis, ut morborum, ita paroxysmorum quoque, cruditatis & coctionis. Nec tussire, nec exspuere secunda demum matutina coepit; sed tussis per principium paroxysmi aliquandiu sicca, deinde sputum mucosum tenax ex flavo viride, quale diebus jam prioribus, sub finem atque declinationem paroxysmi vero demum purulentum fuit. Interim *tertio*, perquam oppido rarum hoc & insolens omnino phaenomenon est, quod per diem reliquum nihil unquam purulenti sputo dicatur rejectum, ulcus magis definitum atque circumscriptum, certis quasi periodorum intervallis aperiendum, innuens.

(XIII.) Non mirum est, sub tantis in pectore turbis etiam *recruduisse* malum abdominis. Quamvis enim suas sibi res quilibet seorsim habuit abscessus, tam ille pectoris, quam alter abdominis, nervorum tamen, intercostalis & vagi paris, consensus intimus atque sanguinis communio, facile in partes etiam hunc iterum venire fecit; forsan etiam inflammationis aliquid ibi rursus excitavit. Sed nec *alterum* inauditum est, dare hoc doloribus homines, & in illam partem statim concedere, corpus suum vermis instar tam diu flectere, incurvare, contorquere, donec requiem inveniant, utut sub hac interdum obrigescant, si vel maxime non in toto, tamen in parte. Obversatur, dum haec scribo, memoriae meae Medicus alius, quoad affectus principales Nostro similimus, aliquando per biduum modo colica graviore detentus, qui, ob torminosos ventris dolores, sublata versus umbilicum retractum genua, remittentibus postea doloribus, extendere non statim potuit rursus, tendinibus genuum flexoribus jam quasi corrugatis, ac relaxatione successiva iterum elongandis. Ex hoc fonte podagricorum & arthriticorum contracturas quoque non raro fluere, totus arbitror.

(XIV.) Quantum hoc sit beneficium, in morbis, non gravioribus saltim ac longioribus, sed quibuscunque omnibus, *caput* manere *liberum*, norunt tam experti, quam contrarium passi. Est haec prerogativa phthiseos ac hecticæ, quod, nisi quidem
C 3 inflam-

inflammatione superveniente abripiantur acute, neque capite, nec ulla fere corporis parte doleant, sed animo forti ac præsentia mentis constante mortem oppetant, vera etiam physica *ευδαιμονία* fruantur. Quemadmodum ergo capitis vel dolor, vel afflictio gravior alia, non est pars querelarum hæctica sibi relictæ, (nisi forte *cerebri vomica* subfuerit, qualem Disp. pecul. exhibuit Dn. *Præsidis* B. PATER) sed aliunde suam repetit originem, si quidem hæcticum adfligit; Sic etiam hæc oculorum vertiginosa obnubilatio, tandem ad syncopem adeo gravem invalescens, symptomathica potius, & ex præcordiis oriunda, quam idiopathica videtur; Ceterum in memoriam mihi revocans studiosum, pleuritice graviter & extra ordinem diu decumbentem, cui, ipsa tandem quadragesima medica veniens, forte animi deliquium, febris acutæ finem tulit.

(XV.) Hæc *febrem* significant, pro gravitate & complicatione morbi *majorem* quoque & clariorem. Alias enim neque lenta tabifica, neque hæctica sibi relictæ, urinam adeo tingit, multo minus ad sedimentum bolare turbat, uti recte notavit in Disputat. allegat. STAHLIUS. Ad hanc febrem vero in curatione phthiseos, addam ego & hæctica, respiciendum semper esse inculcavit Dn. *Præsidis* B. AVUS in Posit. cit. Thesi V.

(XVI.) *Therapia* pathologiæ debet ut subordinari, sic etiam conformari. Unde si hæc fuerit erronea, non genuina, illam quoque vel frustraneam, vel incongruam, quin noxiam, fore necesse est. Sicuti igitur consentientem habemus ægrum, intestinorum abscessus, & pulmonum ulcera, etiam in plurali confitentem, quod in singulari de singulis sufficeret. Sicuti porro dudum confecta res est, non esse ulcus ante abscessum, nec pus sine inflammatione prævia, multo minus hoc intra corpus fieri sine febre, vel manifestiore vel occultiore, vel erysipelacea, vel apostematode vel hæctica: Sic ulceribus ac abscessibus internis alia etiam dari non potuerunt interne, quam qualia externis partium quarumcunque ulcerationibus opponere solent & norunt etiam balneatores

ac tonsores nostri. Logicum enim hic rursus egit Noster, non nisi sublata causa effectum tolli reputans, non nisi prius ulceribus curatis febrem curari persuasus; habito tamen semper partium imprimis laborantium respectu, quem diligenter observandum inculcat MOEBIUS, & huic principio conformiter *Instit. Tab. XIX.* e. g. in thoracis & pulmonis affectibus monet, ne nimis nec refrigeremus, nec exsiccemus, adeo, ut etiam adstringentia sint magis humida.

Quoniam remedia enumerare singula non placuit Nostro, indicationes atque classes medicamentorum generales nominasse contento; Itaque multo minus ego docere alios præsumam, & unica notularum biga acquiescam. Cautelam practicam de *provido* tam *balsamicorum* quam *expectorantium usu* sedulè observavit Noster, utramque fundamento non destitui deprehendens. Deinde, *aquam Fontis Sotherii sulphuream*, bono omine in prato patrio scaturientis, bono cum fructu bibit hætenus & laudavit.

(XVII.) Quantum *Diata* valeat ad morbos, ut inducendos si peccaverit, sic avertendos & curandos, si legitime instituta ac prudenter ordinata fuerit, omnes norunt. Nec raro videas, quod huic deberetur, adscribi decantatæ Naturæ energiæ medicatrici. Quamvis hanc illa egregie juvari non negaverim. Maneat igitur præsidiorum & remediorum medicorum fons tertius omni laude dignus, prioribus duobus, chirurgico & pharmaceutico subordinandus, non raro sine his sufficiens solus, maxime si cibos ita medicamentosos æger seligat, quales ad morbum adeo facientes, & indicationibus ad amussim respondentes hic recensentur.

De *Gelatinis* dicere, ac in illarum laudes excurrere, necessarium non est, postquam peculiarem ipsis disputationem dedit Dn. *Præses*.

Thermoposia autem, cui apologiam Noster hic scribit, campum aperiret amplissimum, excurrendi non saltim in diversa potuum genera, huic vel illi morbo adcommoda, verum etiam
in

in salubritatem inprimis aut noxam horum ipsorum potuum calidorum, qui disceptationibus totidem dederunt ansam. Sed non vacat, his immorari. Habe paucis animi sententiam: Optimæ rei pessimus est abusus; Imo ne usus quidem promiscuus. Si plura voles, evolve de Thea quidem PECHLINI *Theophilum Bibaculum*; De Coffe *les Memoir. pour l'histoir. des Scienc. & des beaux Arts de Tre-voux*, Mois d'avril A. 1716. De Succolata vero ANTONIUM COLMERIUM DE LEDESMA.

(XVIII.) Superstites *querela pristina* docent, superesse statum quoque corporis pristinum; adeoque inducias saltem esse morbi, totidem ignis adhuc sub cineribus gliscentis indices. Non enim considerari possunt hæc, ut morbi superati reliquiæ, a contracta forsan partis debilitate proficiscentes, uti vulgo calendarium quasi quoddam perpetuum, tanquam damnum permanens, circumgestare dicuntur e. g. vulnerati; Sed sunt ipsissima febris hæctica signa, superius jam exposita, abscessuum novo pure rursus implendorum argumenta, proin eorum, quæ supra dicta sunt, *τεκμηρια* proh! dolor *αποδυκτικα*. Quam igitur optandum est, ut hæc *rerum bene se habentium* facies diu modo continuet! Durare enim hæc interdum per annos plusculos, ac vario fato non impleri saltem, sed etiam evacuari rursus, sacculos istiusmodi puricundos posse, & hæc a bonitate naturæ, ac ægroti regimine, quin medentis tractatione, inprimis pendere, tam notum est, quam quod notissimum. Unde piis ad DEUM precibus tandem desino, velit Gratia sua Sotheria Nostro clementer adesse, medicamentis bene dicere, atque Suis Ipsum adhuc diu conservare, ut exoptatum omnes voto damnati suo consequantur

F I N E M!

Vade, Vale, atque cave impingas, præceptaque migres.
Gratia Sotheris Te regat atque tegat!

PRÆSES.